



LABANK SANTRAL SESEL

Bwat Postal 701, Viktorya, Sesel

Tel: (248) 4 282 000; Fax: (248) 4 226 104

Sitweb: www.cbs.sc

KOMINIKE LAPRES

Viktorya – le 26 Mars, 2025

To Lentere Polisi Moneter i reste 1.75% pour dezyenm kar 2025

Bord Labank Santral Sesel in deside mentenir To Lentere Polisi Moneter 1.75% pour dezyenm kar 2025. En revu performans ekonomik pandan premye kar sa lannen i montre ki aktivite dan lekonomi domestik in ganny soutenir prensipalman par lendistri tourizm, menm si lakantite viziter ki'n ganny rikorde pandan sa peryod ti mwens ki lannen pase. Depi konmansman lannen, lakantite deviz etranzer ki'n antre dan sistenm finansyel ensi ki nivo demann, ti pli o ki pandan menm peryod an 2024. Me, logmantasyon dan demann pour deviz etranzer ti depas logmantasyon dan lakantite deviz ki'n ganny esanze dan marse, ki fer ki rounpi in depresye kont dolar ameriken pandan sa premye kar lannen. Toudmenm, an vi bann devlopman dan marse enternasyonal pour deviz, rounpi in apresye anver ero. To lenflasyon lo marse domestik an Fevriye 2025, ti pli ba ki an Fevriye 2024. Lo nivo global, pri manze in kontinyen ogmante tandis ki pri karbiran in redwir an Mars 2025, swivan lekspektasyon ki prodiksyon karbiran pou ogmante pandan lannen. Malgre ki lenflasyon aletranze in kontinyen desann, bann desizyon konsernan polisi moneter par bann labank santral kle i ekspekte varye an vi diferans dan performans zot lekonomi. Bann polisi nouvo gouvènmman elekte Lanmerik in osi kree bokou lensertitid lo nivo mondyal. Sa i relye avek dezakor ant Lanmerik avek son bann partener komers ki annan potansyel agrave pandan lannen, e enfliyans disponibilite e pri bann komodite. Bann konfli ki pe kontinyen dan diferan parti lemond pe osi kontribye anver lensertitid e kapab enfliyans mouvman dan pri komodite alimenter ek karbiran globalman. Lo marse domestik, nivo lenflasyon i ekspekte ogmante dan mwayen term. Alor, prenan kont sa bann devlopman ek lensertitid ki pe persiste, Bord Labank Santral in deside pour kontinyen sipòrt aktivite dan lekonomi domestik.

I annan bokou lensertitid lo nivo enternasyonal, ki pe ganny enfliyanse par diferan devlopman dan bann pli gran lekonomi mondyal. To lenflasyon Lerop in kontinyen redwir e lekspektasyon se ki pandan 2025, i pou reste pre avek 2.0%, ki nivo lenflasyon ki Labank Santral Eropeen i targete. Me lekonomi Eropeen i reste frazil, vi ki son performans in afebli ver lafen 2024. Lerop i ekspekte ganny enpakte par lefe bann tansyon konsernan komers lo nivo global, ensi ki lager ant Larisi ek Ikrenn ki kontinyen poz en gran risk pour sa rezyon. Lanmerik ti rikord en bon performans ekonomik an 2024 konpare avek bann lezot pei avanse. Toudmenm, depi konmansman 2025, in annan bokou lensertitid konsernan bann polisi nouvo gouvènmman Lanmerik. Prenan kont sa bann devlopman, Fon Moneter Enternasyonal in prevwar ki Lekonomi mondyal pou agrandi par 3.3 pousan an 2025, sorti 3.2 pousan lannen pase. Konsernan lenflasyon lo nivo global, sa i ekspekte redwir, sorti 5.7 pousan an mwayenn an 2024 pour ariv 4.2 pousan an 2025.

Pri karbiran lo marse enternasyonal ti ogmante an Zanvye 2025, swivan lanons nouvo sanksyon lo bann tennker Larisi ki transport karbiran. Me pandan Mars 2025, pri karbiran in redwir apre ki Lanmerik in anonse ki i pe al enpoz tarif lo bann lenportasyon sorti Kanada, Lasin ek Meksik, e sa in kree bokou lensertitid. En lot faktor kle pour sa bes dan pri i desizyon par manm lorganizasyon bann pei ki eksport karbiran ek zot bann partener (OPEC+) pou ogmant nivo prodiksyon karbiran apartir Avril 2025. An plis ki sa, bann pei ki pa manm OPEC+ i osi ekspekte prodwir plis karbiran e sa i fer ki son pri i ekspekte redwir dan bann prosen mwan. An sa ki konsern komodite alimanter, pri in kontinyen ogmante, prensipalman akòz demann pour sa bann prodwi ti pli o ki nivo prodiksyon. Dan bann mwan ki pe vini, pri komodite alimanter i anvizaze kontinyen vin pli ser, menm si i pa ekspekte depas nivo ki i ti ete an 2022. Sa prozeksyon pri komodite alimanter ek karbiran i baze lo lensertitid relye avek bann kondisyon klimatik, restriksyon lo leksportasyon serten komodite, larout maritim ki pli long, e bann konfli dan diferan parti lemonn. Dezakor ant bann pei konsernan komers in osi vin en nouvo faktor ki kapab afekte nivo pri lo marse enternasyonal.

Depi konmansman lannen ziska le 16 Mars 2025, en total 78,537 touris ti debark Sesel, e sa ti en rediksyon 3.5 pousan konpare avek menm peryod lannen pase. Sa rediksyon ti prensipalman an rezilta en bes dan lakante viziter Eropeen, an partikilye touris ki sorti Lalmanny, ki ti relye avek larive mwens bato kwazyer sa lannen. Anliny avek sa, lakantite reveni ki sektor tourizm in zenere pandan sa de premye mwan an 2025 ti mwens ki menm peryod lannen pase. Prozeksyon pour sa lannen i montre en logmantasyon dan lakantite viziter, relye avek bann nouvo vol ki pe al komanse, ensi ki aktivite sportif enternasyonal ki Sesel pou organize plitar pandan lannen. Sa i osi ekspekte kontribye plis reveni pour lendistri tourizm. Malgre sa, Sesel pe osi fer fas avek plis konpetisyon sorti kot bann lezot destinasyon touristik dan larezyon. Toudmenm, devlopman dan sektor tourizm i osi depan lo plizyer lezot faktor, tel ki lenpak ki bann tansyon ek konfli i kapab annan lo lendistri tourizm e vwayaz globalman. Labank Santral i konsyan ki sa bann defi i kapab annan en lenpak advers lo lendistri tourizm e osi lo performans lekonomi domestik an zeneral.

Lakantite deviz etranzer ki'n antre dan sistenm finansyel ensi ki demann pour deviz etranzer depi konmansman lannen ziska le 20 Mars 2025, ti pli o konpare avek menm peryod lannen pase. Me logmantasyon dan demann pour deviz etranzer ti depas logmantasyon dan lakantite deviz ki'n antre, ki fer ki rounpi in depresye kont dolar ameriken pandan sa premye kar lannen. Toudmenm, rounpi in apresye anver ero, baze lo bann mouvman ki relye avek devlopman dan marse deviz aletranze. Anliny avek prozeksyon ki pour annan plis aktivite ekonomik domestik pandan lannen, demann pour deviz etranzer i osi ekspekte ogmante. Me, lakantite deviz ki antre dan sistenm finansyel pour kontinyen depan prensipalman lo performans sektor tourizm. Alor, si demann i sirpas lakantite deviz ki i annan lo marse domestik, rounpi i kapab perdi plis valer kont dolar ameriken. Toudmenm, bann devlopman dan marse enternasyonal pour deviz i osi ekspekte enpakte lo valer rounpi anver bann lezot lanmonnen prensipal.

An term devlopman dan lenflasyon, menm si in annan en logmantasyon dan nivo pri depi Me 2024, an Fevriye 2025, To lenflasyon ti *mwens* 0.1% konpare avek menm peryod lannen pase. An mwayenn pandan sa dernyen douz mwan, To lenflasyon lo marse domestik in reste ase ba, lo en To 0.6% an Fevriye 2025. Malgre sa, nivo lenflasyon i ekspekte ogmante dan mwayen term.

Prenan kont tou sa bann devlopman, dan son rankont ki ti fer le 24 Mars 2025, Bord Labank Santral in deside mentenir To lentere polisi moneter a 1.75%, avek bi siport aktivite ekonomik. To lentere ki bann lenstitisyon finansyel pou resevwar ler zot depoz larzan ki an ekse alafen

lazournen pou reste 0.25%. Egalman, To lentere ki sa bann lenstitisyon pou ganny sarze ler zot vin pret larzan avek Labank Santral pou osi ganny mentenir a 3.25%. Poursantaz larzan ki sa bann lenstitisyon finansyel i bezwen kit avek Labank Santral (Minimum Reserve Requirement - MRR) pou reste 13%.

Labank Santral pou kontinyen obzerv devlopman dan lekonomi e reazir kan i nesese, pour fer sir ki son polisi i reste anliny avek son bann lobzektif.